



Broj:01/1-50-1-45,1/07  
Sarajevo, 11.1.2007.

## Z A P I S N I K

### sa 1. sjednice Komisija za pripremu izbora Vijeća ministara BiH

Sjednica je održana 11.01.2007. godine sa početkom u 12,00 sati.

Sjednici su prisustvovali svi članovi Komisije: **Rifat Dolić, Hadži Jovan Mitrović, Jerko Ivanković Lijanović, Branko Dokić, Sefer Halilović, Vinko Zorić, Mirko Okolić, Dragan Vrankić, Zlatko Lagumdžija, Lazar Prodanović, Azra Alajbegović i Halid Genjac.**

Pored članova komisije sjednici su prisustvovali: u ime OHR-a Maja Ribar; u ime OEBS-a Amela Ibrahimović..

Sjednici je prisustvovao Milan Zjajić, koji je obavljao poslove sekretara Komisije.

Sjednica je završena u 13,30 sati.

Nakon kraće rasprave Komisija je jednoglasno prihvatila u pozivu od strane predsjedavajućeg Doma Beriza Belkića, predloženi:

## D N E V N I R E D :

1. Izbor predsjedavajućeg, prvog i drugog zamjenika predsjedavajućeg Komisije za pripremu izbora Vijeća ministara BiH;
2. Razmatranje podobnosti i davanje mišljenja – preporuke za potvrđivanje Nikole Špirića za obavljanje funkcije predsjedavajućeg Vijeća ministra BiH;
3. Tekuća pitanja.

### Ad. 1. Izbor predsjedavajućeg, prvog i drugog zamjenika predsjedavajućeg Komisije za pripremu izbora Vijeća ministara BiH;

Ovom tačkom dnevnog reda je predsjedavao sekretar Milan Zjajić. On je na početku istakao da je očekivao da će neko iz Kolegija doma predsejdavati ovim dijelom sjednice i da mu nije poznato da li postoji politički dogovor oko izbora predsjedavajućeg i njegovog prvog i drugog zamjenika. Podsjetio je na odredbe Poslovnika po kojima je neophodno ostvariti odgovarajuću nacionalnu i entitetsku zastupljenost.

Zatim se otvorila rasprava u kojoj su učestvovali Zlatko Lagumdžija, Azra Alajbegović, Halid Genjac Lazar Prodanović, Rifat Dolić, Jerko Ivanković Lijanović i Vinko Zorić.

Nakon provedene rasprave i postupka predlaganja i nakon što Vinko Zorić nije prihvatio kandidaturu za drugog zamjenika predsjedavajućeg komisija je većinom glasova izabrala:

Halida Genjca za predsjedavajućeg,

Lazara Prodanovića za prvog zamjenika predsjedavajućeg i

Jerka Ivankovića Lijanovića za drugog zamjenika predsjedavajućeg.

### Ad. 2. Razmatranje podobnosti i davanje mišljenja – preporuke za potvrđivanje Nikole Špirića za obavljanje funkcije predsjedavajućeg Vijeća ministra BiH;

Novoizabrani predsjedavajući se zahvalio na ukazanom povjerenju i otvorio raspravu po drugoj tački dnevnog reda.

Zatim se razvila duža rasprava, u kojoj su pored predsjedavajućeg, učestvovali Zlatko Lagumdžija, Vinko Zorić, sekretar Milan Zjajić, Mirko Okolić, Rifat Dolić, Dragan Vrankić i Azra Alajbegović, o upozorenju uz dostavljeni materijal o tajnosti i potrebi vraćanja materijala.

Većina članova Komisije je u diskusiji istakla da svi materijali u postupku provjere trebaju biti dostupni javnosti. Predsjedavajući Genjac je istakao da komisija nema svoj poslovnik i predložio da se na prvoj narednoj sjednici pripremi i usvoji poslovnik koji će regulisati ovo i druga pitanja važna za rad Komisije.

Član Komisije Zlatko Lagumdžija je podnio pismeni zahtjev za učešće na sjednici Nikole Špirića radi odgovaranja na pitanja.

Po dolasku Nikole Špirića na sjednicu Zlatko Lagumdžija je tražio da mu se odgovori na dva pitanja. Prvo: da li su podaci iz popunjenog obrasca i podaci iz imovinskih kartona koji se popunjavaju i predaju Centralnoj izbornoj komisiji BiH u ogovarajućem kontinuitetu i da li se u slučaju značajnih uvećanja imovine to može dokumentovati dokazima o prijavi prihoda i o plaćenom porezu.

Na ovo pitanje Nikola Špirić je odgovorio da je Imovinske kartone popunjavao u više navrata od kako su oni uvedeni i da oni odražavaju kontinuitet njegovog dugogodišnjeg rada u institucijama BiH i rada na Univerzitetu u Banja Luci i Ekonomskom institutu, ali da imovinski karton za Izbore 2006. godine on nije popunio, jer je bio na višednevnom službenom putu u inostranstvu.

Zatim je Zlatko Lagumdžija postavio svoje drugo pitanje koje se odnosilo na članstvo u SKJ i u Opštinskom komitetu opštine Centar Sarajevo.

Odgovarajući na ovo pitanje Špirić je istakao da nikada nije tajio svoje članstvo u SKJ, ali da je, obzirom da obrazac zahtijeva precizne podatke o kretanju od 1992. do 1995. godine mislio da se taj period odnosi i na članstvo u političkim partijama.

U kasnijoj raspravi učestvovalo je više članova Komisije uglavnom iznoseći svoj stav i stav svoje političke stranke prema potvrđivanju predsjedavajućeg Vijeća ministara BiH.

Sefer Halilović je u kratkoj diskusiji istakao da je cijeli postupak diskriminirajući u odnosu na poslanike.

Pošto se pristupilo glasanju:

**1.** Komisija je većinom glasova, 10 glasova "za" i dva glasa "protiv" utvrdila da **Nikola Špirić** ispunjava sve uslove propisane Zakonom o Savjetu ministara BiH i Poslovníkom Predstavničkog doma Parlamentarne skupštine BiH za imenovanje na funkciju predsjedavajućeg Vijeća ministara BiH. Protiv su glasali članovi Komisije Zlatko Lagumdžija i Sefer Halilović.

**2.** Komisija preporučuje Predstavničkom domu Parlamentarne skupštine Bosne i Hercegovine da potvrdi imenovanje **Nikole Špirića** za predsjedavajućeg Vijeća ministara Bosne i Hercegovine.

**3.** Za izvjestioca na sjednici Predstavničkog doma imenovan je predsjedavajući Komisije Halid Genjac, a ostali članovi Komisije na sjednici Doma, a posebno oni koji su glasali protiv će biti u prilici da obrazlože razloge takvog stava.

### **Ad. 3. Tekuća pitanja.**

Kako nije bilo drugih pitanja predsjedavajući je u 13,30 sati zaključio sjednicu.

*Napomena: Odlukom Kolegija sekretara Parlamentarne skupštine BiH sjednice se ne snimaju.*

SEKRETAR KOMISIJE  
**Milan Zjajić**

PREDSJEDAVAJUĆI KOMISIJE  
**Halid Genjac**